

KONSEP VERORDENING: AANHOU VAN DIERE, PLUIMVEE EN BYE KAROO HOOGLAND MUNISIPALITEIT

DEEL 1

WOORDOMSKRYWING

1. In hierdie Verordening, tensy uit samehang anders blyk, beteken –
- “diere”, enige perde, muile, donkies, beeste, varke, skape, bokke, inheemse soogdiere en enige ander wilde diere,
 - “Munisipale Bestuurder” die persoon aangestel ingevolge artikel 82 van die Wet op Plaaslike Regering : Munisipale Strukture, 1998 (Wet No. 117 van 1998)
 - “Munisipaliteit” die Karoo Hoogland Munisipaliteit
 - “oorlas” onder meer, enige handeling, versuim of toestand wat na die mening van die Munisipaliteit skadelik vir die gesondheid of aanstootlik of nadelig is of wat wesenlik inbreek maak op die gewone gemak of gerief van die publiek of die veiligheid van die publiek nadelig raak of wat inbreek maak op die stilte van die omgewing.
 - “spesiale besluit” ‘n besluit deur ‘n meerderheid van die volle getal lede van die Munisipaliteit geneem ; en
 - “troeteldiere” enige honde, katte, marmotjies, hamsters, konyne, pelsmuise, slange of voëls wat nie vir aanteel- of handelsdoeleindes aangehou word nie.

In hierdie verordening, tensy onbestaanbaar met die sinsverband, beteken –

“**diere**” enige perde, muile, donkies, beeste, varke, skape, volstruise, bokke, inheemse soogdiere en enige ander wilde diere;

“**oorlas**” onder meer enige handeling, versuim of toestand wat na die mening van die Raad skadelik vir die gesondheid of aanstootlik of nadelig is of wat wesenlik inbreuk maak op die gewone gemak of gerief van die publiek of die veiligheid van die publiek nadelig raak of wat inbreuk maak op die stilte van die omgewing;

“**Raad**” die Karoo Hoogland Munisipale Raad en sluit in die Burgemeester, Politieke Ampsbekleërs, Politieke Strukture, Munisipale Bestuurder en enige ander Beampte met gedelegeerde bevoegdheid ingevolge Artikel 59 van die Wet op Plaaslike Regering : Munisipale Stelsels (Wet 32 van 2000);

“**troeteldiere**” enige honde, katte, marmotjies, hamsters, konyne of voëls wat nie vir aanteel- of handelsdoeleindes aangehou word nie;

“**belasting**” die belasting wat ingevolge hierdie verordening gehef word;

“belastingkwitansie” ‘n kwitansie deur die Raad uitgereik as bewys dat belasting betaal is;

“dryfgelde” die gelde wat betaalbaar is wanneer ‘n hond ingevolge die bepalings van hierdie verordening deur ‘n gemagtigde beampte van die Raad gevang, aangekeer en na die skut vervoer is;

“eienaar” met betrekking tot ‘n hond ook iemand wat ‘n hond aanhou of in sy besit of onder sy sorg het, uitgesonderd –

- (A) ‘n persoon wat besigheid doen as ‘n hondeteler of ‘n herbergeienaar;
- (B) ‘n veearts, ten opsigte van ‘n hond wat vir behandeling in sy sorg gelaat is;
- (C) ‘n vereniging vir die voorkoming van mishandeling en die bevordering van die welsyn van diere, wat kragtens die bepalings ingevolge nasionale wetgewing, as ‘n fondsinsamelingsorganisasie geregistreer is;
- (D) enige blinde persoon wat ‘n gidshond of leihond gebruik;

“hond” ‘n reun sowel as ‘n teef;

“herberg” enige perseel waar akkommodasie aan honde en katte vir besigheidsdoeleindes voorsien word;

“hondeboer” ‘n persoon wat sodanige besigheid doen en by die kennel-unie van Suid-Afrika geregistreer is;

“jaar” ‘n tydperk van twaalf maande wat om 24:00 op 31 Desember eindig;

“skutmeester” iemand wat in beheer van ‘n skut is;

“pluimvee” enige hoenders, ganse, eende, kalkoene, makoue en duiwe, wild of mak;

“**Munisipale Bestuurder**” ‘n persoon aangestel ingevolge Artikel 82 van die Wet op Plaaslike Regering : Munisipale Stelsels (Wet 32 van 2000).

DEEL 2

DIERE

Skriftelike toestemming

2. Niemand mag sonder die skriftelike toestemming van die Munisipale Bestuurder enige diere (uitgesonderd troeteldiere) op enige perseel of eiendom aanhou of toelaat dat dit daarop aangehou word nie, en sodanige toestemming kan teruggetrek word indien daar eniger tyd ‘n oorlas ontstaan of die vereistes van hierdie Verordening nie nagekom word nie.

Getal diere

3. Ten einde die aanhou van diere binne dorpsgebiede te beheer en te beperk, kan die Munisipaliteit van tyd tot tyd by spesiale besluit die getal, soorte en geslag diere wat per eenheidsgebied aangehou mag word, bepaal asook die gebiede waarbinne sodanige diere verbied word.

Planne vir strukture moet goedgekeur word

4. (1) ‘n Aansoek om toestemming om diere aan te hou, moet vergesel wees van ‘n gedetailleerde terreinplan waarop alle bestaande en voorgestelde strukture en heinings op die perseel aangedui word en aangepas is vir die spesifieke diere;
- (2) Gedetailleerde planne en spesifikasies moet voorgelê word aan en goedgekeur word deur die Munisipaliteit ten opsigte van alle strukture waar diere gehuisves gaan word.
- (3) Die getal, soorte en geslag van diere moet op die plan aangedui word.
- (4) Ondanks enige andersluidende bepalings in hierdie Verordening vervat, kan die Munisipaliteit weier om die aansoek en planne goed te keur indien hy van mening is dat die eiendom, vanweë die ligging of geografiese kenmerke daarvan, ongeskik is vir die aanhou van diere daarop.

Strukture moet aan vereistes voldoen

5. (1) Alle strukture waarin diere gehuisves word, moet op deeglike wyse gebou word en van materiaal wat die Munisipaliteit goedkeur.
- (2) Geen struktuur mag geleë wees binne ‘n afstand van 15m van enige woning en personeelkamers of die grens van ‘n woonperseel en 8m van enige padgrens nie.
- (3) Elke deel van die struktuur moet behoorlik in stand gehou en geverf word so dikwels as wat die Munisipaliteit nodig ag.
- (4) Geen diere mag aangehou word in ‘n struktuur of op grond wat na die mening van die Munisipaliteit onwenslik of aanstootlik is vanweë die ligging of bou daarvan of die wyse waarop dit gebruik word nie.

Perseel moet skoon gehou word

6. (1) Alle mis wat van diere afkomstig is, moet opgeberg word op ‘n wyse wat deur die Munisipaliteit goedgekeur is en moet op ‘n gereelde grondslag weggedoen word ten einde te verhoed dat ‘n oorlas ontstaan.
- (2) Alle voer moet op ‘n knaagdierdigte plek opgeberg word.
- (3) Die perseel moet in so ‘n toestand gehou word dat dit nie knaagdiere uitlok of ‘n skuilplek daarvoor bied nie.

Diere wat op ‘n onbevredigende wyse aangehou word

7. Wanneer ookal, na die mening van die Munisipaliteit, enige diere wat op enige perseel aangehou word, ongeag of sodanige perseel kragtens hierdie Verordening deur die Munisipaliteit goedgekeur is of nie, ‘n oorlas of gevaar vir die gesondheid is, kan die Munisipaliteit by wyse van ‘n skriftelike kennisgewing die eienaar of okkupeerder van

sodanige perseel aansê om, binne 'n tydperk wat in sodanige kennisgewing aangedui word, maar minstens 24uur na die datum van die kennisgewing, die oorsaak van sodanige oorlas of gevaar vir die gesondheid te verwyder en genoemde oorlas of gevaar vir die gesondheid te verhelp en om die werk te verrig of die dinge te doen wat die Munisipaliteit vir genoemde doel nodig ag.

HOOFSTUK 2

HONDE- EN KATTE HERBERGE

Perseelvereistes

8. Niemand mag 'n honde- of katte herberg aanhou tensy daar aan die volgende vereistes voldoen word nie :
 - (a) Elke hond of kat moet aangehou word in 'n omheinde plek wat aan die volgende vereistes voldoen :
 1. Dit moet van duursame materiaal wees en die toegang daartoe moet toereikend vir skoonmaakdoeleindes wees.
 2. Die vloer moet van beton of ander duursame materiaal gebou wees wat glad afgewerk is en afgeskuins is na 'n geut van 100mm breed wat strek oor die volle breedte van die vloer en geleë is binne die omheinde plek, welke geut afgeskuins moet wees en moet dreineer na die rioolput wat met die Munisipaliteit se rioolstelsel verbind is deur middel van 'n erdepyp of 'n pyp van enige ander goedgekeurde materiaal met 'n deursnee van ten minste 100mm, of met 'n ander goedgekeurde rioolstelsel.
 3. 'n Rand met 'n hoogte van 150mm moet oor die volle lengte van die geut in subparagraaf (2) gemeld, en aan die kant daarvan wat langs die omliggende buitegebied is, verskaf word om te verhoed dat vloedwater uit sodanige gebied die geut binnekom.

- (b) Elke omheinde plek in paragraaf (a) gemeld, moet 'n oordekte skuiling vir die huisvesting van honde en katte hê wat aan die volgende vereistes voldoen :
1. Elke muur moet van baksteen, klip, beton of ander duursame materiaal gebou wees en moet 'n glade binneoppervlak hê sonder barste of oop voeë.
 2. Die vloer moet van beton of ander duursame materiaal gebou wees wat glad afgewerk is sonder enige barste of oop voeë, en die oppervlak tussen die vloer en die mure van 'n permanente struktuur moet holrond wees.
 3. Elke skuiling moet toereikende toegang daartoe hê vir die skoonmaak daarvan en die vernietiging van ongediertes.
- (c) In die geval van honde kan 'n hondehok van gevormde glasvesel of ander soortgelyke materiaal, wat verplaasbaar is en geplaas is op 'n voetstuk van beton of ander duursame materiaal met 'n afwerking wat maklik skoongemaak kan word, sonder barste of oop voeë verskaf word in plaas van 'n skuiling soos beoog in paragraaf (b), en as die voetstuk van sodanige hondehok nie waterdig gemaak is nie, moet 'n slaapplank wat die hond in staat stel om droog te bly in elke sodanige hondehok verskaf word.
- (d) 'n Betonskort wat tot ten minste 1m breed is, moet by die ingang van die omheinde plek, oor die volle breedte daarvan, verskaf word, welke skort afgeskuins moet wees sodat dit water van die omheinde plek af wegvoer.
- (e) 'n Toevoer drinkbare water wat toereikend is vir drink- en skoonmaakdoeleindes moet in of aanliggend aan die omheinde plek verskaf word.
- (f) Alle voedsel moet opgeberg word in knaagdierdigte houers met digsluitende deksels in 'n pakkamer.
- (g) Daar moet ten minste 5m oop en onbelemmerde ruimte verskaf word tussen enige skuiling of omheinde plek en die naaste punt van enige woonhuis. Ander gebou of struktuur wat vir menslike bewoning gebruik word of enige plek waar voedsel vir menslike verbruik opgeberg of berei word.
- (h) Afsonderingsgeriewe vir honde en katte wat siek is, moet ten genoeg van die Munisipaliteit verskaf word.
- (i) As hokke voorsien word vir die aanhou van katte, moet sulke hokke van duursame, ondeurdringbare materiaal wees en so gebou word dat dit maklik skoongemaak kan word.

HOOFSTUK 3

TROETELDIERWINKELS

Perseelvereistes

9. Niemand mag die saak van 'n troeteldierwinkel op enige perseel bedryf nie tensy die perseel ooreenkomstig die volgende vereistes gebou en toegerus is asook gesoneer is vir die doel nie:
- (a) Elke muur, met inbegrip van enige afskorting van enige gebou, moet gebou wees van baksteen, beton of ander duursame materiaal, 'n glade binneoppervlak hê en met 'n ligkleurige wasbare verf geverf wees of 'n ander goedgekeurde afwerking hê.
 - (b) Die vloer van enige gebou moet van beton of ander duursame en ondeurdringbare materiaal wat glad afgewerk is, gebou wees.
 - (c) Die plafon van enige gebou moet van duursame materiaal gebou wees, glad afgewerk wees, stofdig wees en met 'n ligkleurige wasbare verf geverf wees.

- (d) Sanitêre geriewe moet voorsien word ingevolge die Nasionale Bouregulasies.
- (e) 'n Knaagdierdigte pakkamer moet voorsien word ten opsigte genoeg van die Munisipaliteit.
- (f) Fasiliteite vir die was van hokke, panne en ander toerusting moet voorsien word ten genoeg van die Munisipaliteit.
- (g) Kleedkamer- of sluitkasfasiliteite moet indien vereis, voorsien word ten genoeg van die munisipaliteit.
- (h) Geen deur, venster of ander opening in enige muur van 'n gebou op die perseel mag nader as 2m wees van enige ander deur, venster of ander opening in enige ander gebou waarin voedsel berei, opgeberg of vir menslike verbruik verkoop word of deur mense verbruik word nie.
- (i) Daar mag geen direkte toegang tot enige bewoonbare vertrek of enige vertrek waarin klere of voedsel vir menslike verbruik opgeberg word, wees nie.

Sakevereistes

10. Elke persoon wat die saak van 'n troeteldierwinkel bedryf, moet –
- (a) Aparte verwyderbare hokke verskaf vir die huisvesting van diere, pluimvee of voëls, en die volgende vereistes moet nagekom word :
 1. Die hokke moet geheel en al van metaal of ander duursame, ondeurdringbare materiaal gebou wees en toegerus wees met 'n verwyderbare metaalpan onder die vloer daarvan om die skoonmaak daarvan te vergemaklik.
 2. Elke hok moet vry van enige duik of holte wees wat nie redelik toeganklik vir die skoonmaak daarvan is nie en die binneholte van elke buis-of hol toebehoore wat verband daarmee gebruik word, moet verseël wees.
 3. Indien konyne in 'n hok aangehou word, moet die metaalpan in subparagraaf (1) gemeld, in 'n verwyderbare houer dreineer.
 4. Elke hok moet toegerus wees met 'n drinkbak wat vol water gehou moet word en vir troeteldiere wat in die hok aangehou word, toeganklik is;
 - (b) Knaagdierdigte houters van ondeurdringbare materiaal en met digpassende deksels in die pakkamer verskaf waarin alle troeteldierkos opgeberg moet word;
 - (c) Die perseel en elke hok, pan, houer, bak, mandjie en alle apparaat, toerusting en toestelle wat in verband met die troeteldierwinkel gebruik word, in 'n skoon higiëniese en goeie toestand en vry van ongediertes in stand hou;
 - (d) Doeltreffende maatreëls tref om te voorkom dat vlieë, kakkerlakke, knaagdiere en ander ongediertes geherberg word of uitbroei en dit te vernietig, en om aanstootlike reuke wat uit die aanhou van troeteldiere op die perseel voortspruit, te voorkom.
 - (e) Oorpakke of ander beskermende klere verskaf vir die gebruik van persone wat in verband met die troeteldierwinkelbedrywighede staan en toesien dat sodanige klere deur elke werknemer gedra word wanneer hy of sy op diens is;
 - (f) Te alle tye elke troeteldier in die gebou op die perseel hou tensy die Munisipaliteit andersins goedkeur;
 - (g) Afsonderingsfasiliteite verskaf waarin elke troeteldier wat siek is of lyk, aangehou moet word terwyldit op die perseel is;
 - (h) Toesien dat daar standhoudende toevoer drinkbare water vir drink- en skoonmaakdoeleindes is;
 - (i) Toesien dat die perseel te alle tye so geventileer is dat daar genoegsame beweging van lug vir die gerief en oorlewing van troeteldiere is; en –
 - (j) Toesien dat die getal troeteldiere per hok nie sodanig is dat die vrye beweging van sodanige troeteldiere aan bande gelei word nie.

HOOFSTUK 4 TROETELDIERSALONNE

Perseelvereistes

11. Niemand mag die saak van 'n troeteldiersalon in of op enige perseel bedryf nie tensy die perseel gebou en toegerus is in ooreenstemming met die volgende vereistes :

- (a) 'n vertrek moet voorsien word wat 'n minimum vloeroppervlakte van 6,5m² het vir die was en droogmaak van honde of katte en die knip van hul hare
- (b) Die vloer van so 'n vertrek moet gebou wees van beton of ander duursame, ondeurdringbare materiaal wat glad afgewerk is en afgeskuins is na 'n geut wat in ooreenstemming met die Nasionale Bouregulasies dreineer.
- (c) Die oppervlak tussen die vloer en die muur van so 'n vertrek moet holrond wees en die holrond gedeelte moet 'n minimumstraal van 75mm hê
- (d) Elke binnemuuroppervlak moet glad afgepleister wees en geverf wees met 'n ligkleurige, wasbare verf.
- (e) Die vertrek moet toegerus wees met die volgende –
 - 1. 'n bad of dergelike fasiliteit met 'n konstante toevoer warm en koue water, wat dreineer ingevolge die Nasionale Bouregulasies;
 - 2. 'n tafel met 'n ondeurdringbare blad; en
 - 3. 'n vullishouer van duursame, ondeurdringbare materiaal met 'n digsluitende deksel vir die opberging van afgesnyde hare totdat dit verwyder word.
- (f) As hokke voorsien word vir die aanhou van katte en honde moet sodanige hokke van duursame materiaal wees en so gebou wees dat dit maklik skoongemaak kan word.

Sakevereistes

12. Elke persoon wat die saak van 'n troeteldiersalon bedryf moet –
- (a) Verseker dat alle hokke, met inbegrip van die bodem, van metaal gemaak is en verskuif kan word;
 - (b) Verseker dat alle plaagbestrydingsmiddels en middels vir die was van honde en katte en die skoonmaak van toerusting en materiaal, opgeberg word in aparte metaalkaste;
 - (c) Toesien dat alle tafels wat vir die droogmaak en versorging van honde en katte gebruik word, van metaal is, met duursame en ondeurdringbare blaaie;
 - (d) Die perseel en elke hok, pan, houër, bak, mandjie en alle apparaat, toerusting en toestelle wat in verband met die troeteldiersalon gebruik word, in 'n skoon, higiëniese en goeie toestand en vry van ongediertes in stand hou;
 - (e) Te alle tye elke hond of kat in die gebou op die perseel hou, tensy die Munisipaliteit andersins goedkeur;
 - (f) Verplaasbare opberghouers van ondeurdringbare materiaal met digpassende deksels verskaf vir die opberg van honde- en kattermis;en
 - (g) Alle mis en ander afvalmateriaal minstens een keer al om 24uur uit die omheinde plek en skulping verwyder en dit in opberghouers in paragraaf (f) gemeld, is

DEEL 3

PLUIMVEE / VOëLS

Bepalings van hierdie deel moet aan voldoen word binne 'n sekere tyd

13. Niemand wat op die datum waarop hierdie Verordening afgekondig word, pluimvee in die pluimveehok of –kamp aanhou of toelaat dat dit daarin aangehou word, mag voortgaan om na 'n tydperk van 12 maande vanaf die datum waarop hierdie Verordening in werking tree, pluimvee aan te hou of te laat aanhou nie, tensy daar ten volle aan die vereistes van hierdie deel voldoen is.

Toestemming van Munisipaliteit moet verkry word

14. (1) Niemand mag enige pluimvee op enige perseel aanhou of laat aanhou sonder die skriftelike toestemming van die Munisipaliteit nie.
- (2) 'n Aansoek om sodanige toestemming moet vergesel word van 'n terreinplan waarop die ligging van alle strukture waarin die pluimvee aangehou gaan word, aangetoon word, asook die materiaal wat gebruik gaan word en die soort en getal pluimvee wat aangehou gaan word.
- (3) Die Munisipaliteit het die reg om by die verlening van toestemming om pluimvee aan te hou, die getal en sort pluimvee te bepaal wat aangehou kan word, en niemand mag 'n groter getal pluimvee of pluimvee van 'n ander soort aanhou as die wat die Munisipaliteit bepaal het nie.

- (4) As dit uit die terreinplan blyk dat die vereistes van hierdie Deel nie nagekom kan word nie, verleen die Munisipaliteit nie toestemming vir die aanhou van pluimvee nie.
- (5) Die Munisipaliteit kan sodanige toestemming intrek indien die vereistes van hierdie Deel in enige stadium nie nagekom word nie.
- (6) Die Munisipaliteit kan verbied dat enige pluimvee in enige gebied aangehou word indien die omgewing of digtheid van die bevolking sodanig is dat die aanhou van enige pluimvee 'n oorlas of gevaar vir die gesondheid skep of kan skep.

Pluimvee moet in goedgekeurde strukture aangehou word

15. (1) Niemand mag pluimvee in 'n pluimveehok, pluimveekamp of struktuur aanhou as in 'n pluimveekamp of struktuur waarvoor die Munisipaliteit toestemming verleen het nie, en niemand mag sodanige hok, kamp of struktuur verander of verskuif sonder skriftelike toestemming van die Munisipaliteit nie.
- (2) Niemand behalwe lede van 'n *bona fide*-duiweklub mag pluimvee buite die pluimveeveehok of pluimveehok waarvoor daar toestemming verleen is, loslaat nie.

Spesifikasies vir strukture

16. Niemand mag 'n pluimveehok of pluimveekamp oprig of gebruik vir die doel om pluimvee aan te hou nie waarvan enige gedeelte –
 - (a) Binne 1,5m is van 'n deur of venster na 'n woning, huiswerkerskwartiere of bewoonde buitegeboue, of van 'n gebou waar voedsel gehanteer, opgeberg of berei word, of van 'n straat; of
 - (b) Nader as 1,5m is van enige gebou wat in paragraaf (a) genome is, of van enige heining; of
 - (c) Hoër as 2,4m of laer as 1,2m by enige punt is : Met dien verstande dat waar duiwe aangehou word, die totale hoogte nie 3,6m mag oorskry nie.

Vereistes vir konstruksie van strukture

17. Niemand mag 'n pluimveehok oprig of gebruik vir die doel om pluimvee aan te hou nie, wat nie aan die volgende vereistes voldoen en op vakkundige wyse ten genoeg van die Munisipaliteit opgerig is nie.
 - (a) Die mure, dak vloer mag geen hol plekke, omheinde tussenruimtes of gate hê wat skuiling aan knaagdiere, ongediertes of pluimveeparasiete kan verleen nie.
 - (b) Die vloer moet van baksteen, beton, asphalt of ander materiaal wat deur die Munisipaliteit goedgekeur is, wees en die oppervlak daarvan moet glad wees en skuins loop sodat alle vuil en spoelwater kan weglou.
 - (c) Die mure moet van baksteen, beton of ander geskikte materiaal wees wat vir die doel deur die munisipaliteit goedgekeur is, en moet, behalwe in die geval van 'n hok vir die aanhou van duiwe, met glad afgewerkte sementpleister gepleister wees, en moet aan die binnekant en buitekant afgewit of met olie verf gevef wees.
 - (d) Die dak moet van glasvesel of golfyster of ander geskikte materiaal wees wat deur die Munisipaliteit goedgekeur is.

Vereistes vir die aanhou van pluimvee

18. Elke persoon wat pluimvee in 'n pluimveehok of pluimveekamp aanhou of laat aanhou –
 - (a) Moet sodanige pluimveehok of pluimveekamp te alle tye in 'n deeglik skoon toestand en vry van knaagdiere, ongediertes en parasiete hou ;
 - (b) Moet alle pluimveemis behoorlik opberg in 'n nie-gegolfde metaalbak met 'n dig passende deksel of ander houers soos deur die Munisipaliteit goedgekeur;
 - (c) Moet sodanige pluimvee op 'n behoorlike wyse voer sodat dit nie 'n oorlas veroorsaak of knaagdiere, vlieë of ander ongediertes aanlok nie, en alle oorskietkos of ander verderfbare stof moet minstens een maal elke dag uit die pluimveehok of pluimveekamp verwyder word.
 - (d) Moet alle pluimveekos in metaal- of ander bakke bêre wat vir knaagdiere toeganklik is; en
 - (e) Mag nie 'n groter getal pluimvee in een besonderde pluimveehok of pluimveekamp as een voël, en in die ander geval van duiwe, twee voëls, per 0,36m² van die totale vloerruimte van sodanige pluimveehok of pluimveekamp aanhou of laat aanhou nie, en mag geen pluimvee aanhou wat 'n oorlas veroorsaak deur te kraai of kekkel nie.

Gesondheidsvereistes

19. Niemand mag pluimveeskropgoed,-vullis of-mis op so 'n wyse of vir so 'n tydperk op 'n perseel plaas, gooi, laat of toelaat dat dit daarop bly sodat dit die uitbroei van vlieë bevorder of knaagdiere of ander ongediertes daardeur na sodanige perseel aangelok word nie.

Munisipaliteit mag die gebruik van sekere strukture verbied

20. Die Munisipaliteit kan, deur middel van die betokening van 'n skriftelike kennisgewing aan iemand wat pluimvee in 'n pluimveehok of pluimveekamp aanhou of laat aanhou, die gebruik van sodanige pluimveehok of pluimveekamp verbied indien dit nie na die mening van die Munisipaliteit ongeskik, ongewens of aanstootlik is weens die ligging of bou daarvan of die wyse waarop dit gebruik word.

Spesifikasies vir kratte

21. Niemand mag pluimvee in kratte wat nie aan die volgende vereistes voldoen plaas nie :
- Die vloerruimte van die krat wat kalkoene of ganse bevat, moet minstens 0,09m² per voël wees wat daarin geplaas word, en die hoogte van sodanige krat moet minstens 750mm wees.
 - Die vloerruimte van die krat wat ander pluimvee bevat moet minstens 0,045m² per voël wees en die hoogte van sodanige krat moet minstens 500mm wees.
 - Die vloere van sodanige kratte moet van soliede hout of ander soliede materiaal wees.
 - Twee drinkbakke met vars water, wat in teenoorgestelde hoeke van die krat aangebring is, moet in elke krat aangebring wees, moet in elke krat verskaf word. Sodanige bakke moet van die onstortbare soort en minstens 125mm diep en 100mm in deursnee wees.
 - Elke krat moet geskikte bakke met kos bevat
 - Verskillende soorte pluimvee mag nie in dieselfde krat geplaas word nie.

DEEL 4

AANHOU VAN BYE

Die aanwending van Deel

22. Hierdie deel geld alleen binne daardie gedeelte van die Munisipaliteit se regsgebied wat deur die Munisipaliteit by kennisgewing in die *Provinsiale Koerant* afgebaken is vir die doel om die aanhou van bye te beheer en word in hierdie Deel 'n "beheerde gebied" genoem.

Vereistes vir die aanhou van bye binne beheerde gebied

23. (1) Niemand hou bye binne 'n beheerde gebied aan –
- Sonder 'n permit uitgereik ingevolge artikel 24 (2)(b) nie;
 - Op 'n perseel kleiner as 3750 vierkante meter nie;
 - Behalwe in 'n roosterraamwerkkorf wat deur die Munisipaliteit goedgekeur is nie, geleë minstens 100m van enige straat, woonhuis, besigheidsplek of hoenderhok, of plek waar diere of voëls aangehou word en wat omhein is met 'n sterk draadheining of muur van 'n minimum hoogte van 1,5m op 'n afstand van minstens 5m in enige rigting van sodanige korf, sodat sodanige korf vir diere of ongemagtigde persone ontoeganklik is;
 - Op 'n perseel wat geleë is binne 400m, gemeet van die naaste punt van die naaste grens van sodanige perseel, van die naaste punt van die naaste grens van 'n kerk, skool, hospital of bioskoop of enige ander vergemaklikheids-, vergader- of ontspanningsplek nie.

Permitte

24. (1) 'n aansoek om permitte
- Word aan die Munisipale Bestuurder gerig
 - Gaan vergesel van die gelde deur die Munisipaliteit bepaal.

- (2) na ontvangs van die aansoek in subartikel (1) genoem, kan die Munisipale Bestuurder –
- (a) die perseel en die geriewe van die aansoeker inspekteer of laat inspekteer;
 - (b) die permit behoudens die voorwaardes wat hy of sy in belang van openbare veiligheid nodig ag uitreik; of
 - (c) skriftelik weier om die permit uit te reik en sy of haar redes vir weiering aan te wys.
- (3) 'n Permit uitgereik ingevolge subartikel (2)(b) is vir 'n jaar geldig en kan deur die permithouer hernu word voor die verval deur –
- (a) betaling van die gelde deur die Munisipaliteit vir sodanige hernuwing bepaal te betaal; en
 - (b) die Munisipale Bestuurder te oortuig dat alle permitvoorwaardes wat op veiligheid van die publiek gerig is steeds nagekom word.
- (4) 'n Permit uitgereik ingevolge subartikel (2)(b) kan deur die Munisipaliteit ingetrek word indien die permithouer 'n bepaling van hierdie Deel of 'n voorwaarde waar behoudens die permit uitgereik is oortree of nie daaraan voldoen nie.

DEEL 5

STRAFBEPALING EN KORT TITEL

Strafbepaling

25. Enige persoon wat enige van die voorafgaande artikels oortree of weier om gehoor te gee aan 'n bevel wat wettig daarkragtens gegee is, is aan 'n misdryf skuldig en by skuldigbevinding strafbaar met 'n boete of gevangenisstraf van hoogstens een jaar, of met beide 'n boete en met daardie gevangenisstraf.

Herroeping van wette en voorbehoude

26. (1) Die volgende wette word hierby herroep :
Geen
- (2) Enige toestemming verkry, reg toegestaan, voorwaarde opgelê, aktiwiteit veroorloof of ding gedoen kragtens 'n herroepe wet word, na gelang van die geval, geag kragtens die ooreenstemmende bepaling van hierdie Verordening (as daar is), verkry, toegestaan, opgelê, veroorloof of gedoen te gewees het.

Kort Titel

27. **Hierdie Verordening heet die verordening op die Beheer oor Aanhou van Diere, Pluimvee en Bye, 2020.**